

LAAX

Aunghels e canons e gloria

La quarta dumengia d'advent han dus chors da Laax envidau a concert. Ella baselgia parochiala ha gl'auditori gudiu producziuns dil chor mischedau e dil chor d'affons TICO. Visitadras e visitaders han astgau separicipar.

AUGUSTIN BEELI/FMR

Muments d'entusiassem ha ei dau duront il concert dil chor mischedau Laax e dil chor d'affons TICO ella baselgia parochiala avon in'jamna. Per exempel cu *Umberto Camathias* ha tgamunau il canon «I wake up this morning». Circa 250 persunas ella baselgia han cantau communablamein quel. Ils affons ed ils carschi el chor han entschiet. Lu ei ina vart dils bauns entrada el canon. Treis tacts pli tard il pievel silla lautga, puspei treis tacts suenter la glicied da tschella vart dalla nav-baselgia. Gl'entir local ei stau ina resonanza vocala. Sogn Gagl e sogn Otmar pon haver giu tschaffen. Gia avon haveva *Rest Giusep Tuor* fatg il medem exercezi cul canon «Gloria a Diu ell'altezia». Il pievel ha gudiu veseivlamein d'esser involvaus en quei concert.

Bugen e cun ardur

Il feagl accumpignont haveva annunziat 24 tets da cant e musica. Atgnamein eis ei bia per in concert d'advent. La participaziun activa da visitadras e visitaders ha dau tempra a quel. Advent e Nadal ei il temps ch'ins sa consumar abundantamein musica e melodias dulstschas. Dapertut aud'ins «Jingle Bells», «Christmas Tree» e «White Christmas». Gl'auditori ella baselgia parochiala da Laax ha astgau guder autras melodias. Dus chors cun in program multifar han purschiu in'alternativa. Il chor d'affons TICO che *Umberto* e *Rinaldo Camathias* han fundau avon varga quater onns ha fatg allusiun al chor dils aunghels ch'ei cumparius sur la stalla a Betlehem. «Aunghels contan en roschadas» han ils affons cantau frestgamein e schau resunar la melodia tradiziunala franzosa.



Vesta viaden el chor duront ina canzun comunabla.

FOTO AUGUSTIN BEELI

Canzuns per latin, romontsch, engles e russ

Ella baselgia parochiala da Laax han ils «aunghels gronds» contribuui al deletg. Il chor mischedau conta dapi 1992 sut la bitgetta da *Rest Giusep Tuor*. Dapi che la formaziun exista, embellescha ella mintg'onn occurrenzas e fiastas profanas ed ecclesiasticas. Gl'auditori ha priu notizia ch'il diember da cantaduras e cantadurs ei sereducius. Ch'ellas ed els contan bugen e cun ardur, ha il chor cumprovau cun plirs blocs en latin, romontsch, engles e russ. La baselgia

stignada plena ha tedlau arranschaments da *Lorenz Maierhofer*, Robert Cantieni e d'alters. All'orgla e clavazin ha *Dirk Sauer* sunau ed accumpignau omis dus chors.

Cun bandunar la baselgia ha la cuntrada enveda accentuau la magia da quella quarta dumengia d'advent. Ils varga 30 affons dil chor TICO e las cantaduras ed ils cantadurs dil chor mischedau da Laax han schau sentir la cuminonza. Il concert ha dau gl'impuls d'ir cun buns sentiments el Nadal 2024.